


廣安縣志
十冊之三

廣安州新志卷十二

土產志



巴人謂貨貝曰賓又謂賦曰賓故秦漢貴賓錢賓布重其產也貨殖傳曰地饒庀薑橙棣器多銅鐵竹木固不獨丹穴擅富懷清築臺茹醬購珍唐蒙通道矣廣安古賓城也土泉膏衍物產特饒凡山林竹柏之材原野羽毛之族陂池鱗介之蟲水陸草木之實巖洞藥石之寶畜產皮角之富自農圃之學畜牧之家徵厥記載譜厥詩歌皆通商惠工之本也惟邃古重農穀殖稱最衍以高原下隰勤以東作西成蕃盈四境充牣萬寶焉揆其本富視園廛漆林之利直什伯之倍蓰之至菽麥梁稷家給人足販輸於舟填咽於市終歲轉運莫知其極若夫富靈之藥魚子之鐵天池之竹紙大山之礦炭嚴道銅山不能喻朱提銀流不足侔矣居積者富貲百

萬遠賈者利獲奇贏獨鹽蠟漆茶土性罕宜民用所需必由外運
通劑有無固其常也茲取日用所取資民生所利賴者擇要彙書
義歸翔實充貢者著其舊納稅者臚其新古有者紀其名今有者
詳其目蒞敷之鬯既本於天工製造之成亦徵於人巧擬諸江陵
以橘侯安邑以棗富魚陂百石鹽豉千合山居足魚澤人足鹿皆
講治生之要旨徵致富之奇書已若雞豚狗彘之庸蔥韭薤蒜之
細耳目恆覲無待鋪陳志土產

穀之屬

女兒穀本黏穀之別種春夏種秋日穫宋史景德四年廣安知軍
王奇獻嘉禾天中記廣安有金羹玉版通志女兒穀卽方輿勝覽
所謂金羹玉版也稻有數十種以女兒穀爲佳今巴蜀以米之美
者名其種曰廣安黏

香稻古曰香秬莖葉似茅而紅高與常穀等粒稍長大米雪白而香尤滋潤穀之珍品一曰香秬

糯穀一曰秬性黏宜膏腴田有長團數種以釀甘酒爲最米蒸糕餅曰粢煮飴糖曰餈蒸熟而陰乾曰凍米取用曰廣田家少種故價倍於常穀

膏粱產山鄉有黃黑白三種莖高丈許葉似蘆荻穗大如帚粒大如椒宜釀酒近大山者利尤夥

粟種宜高燥土葉如大莖結穗作黃色顆粒極細有龍爪狗尾諸名一曰小米

麥有大小二名秋種夏熟說文金王生火王死也專用作麪又蕎麥芋麥皆宜釀貧家常種以救荒

豆有黃綠紅黑四種惟蠶豌豆以蠶時熟黃者清明種六月收

用作菽乳綠者夏種六十日而收能解諸毒又有青皮豆緣坡而蔓十冬月始收較大

胡麻一曰脂麻葉名青蘘莖名麻蕒如四葉菜形子生殼中熟時曬乾取之有黑白褐三種以榨油絕香美

絲之屬

絲寰宇記廣安軍土產明志亦同今蘇家場戴市花橋三處春蠶出絲黃白瑩然僅以銷售本地

絹寰宇記廣安軍土產九域志軍歲土貢絹五疋今無

紬唐渠州取以充貢寰宇記廣安軍土產咸同中花橋伍姓業此利勝川北大紬

綿唐渠州取以充貢寰宇記廣安軍土產綿乾嘉中土綿不濟歲仰給湖北轉運城中花行特盛鄉市亦販買於萬縣利至鉅萬今

洋紗盛行機器所成不耐久紡織微矣

布之屬

賓布漢以輸賦楊雄賦曰黃潤比筒左思賦筒中黃潤一端數金言賓布也寰宇記廣安土產布今花橋人家以績布爲業兩題織以朱絲曰紅邊布疋四丈八尺不染色歲販鬻鄰大商賈絡繹實曰廣安特產蓋古筒中之遺製他邑所無

金之屬

鐵產宕渠漢初有官主鼓鑄今州大山接渠鄰界皆產鐵華陽志曰宕渠鐵官山圖所采

石之屬

石蜜產宕渠華陽志山圖所采圖經卽崖蜜其蜂黑色作房於危崖高峻處或石窟中以長竿刺令蜜出承取之味醲色綠入藥勝

於他蜜

礦炭產魚子鐵山曰魚子者以鐵顆粒極細如魚子也宋史梓州路轉運使崔輔判官張固請卽廣安軍之鐵山采礦炭置監於合州並銷售小錢以鑄減輕大錢未得報先移合州相地置監州以上聞朝廷以輔固爲擅鑄錢皆坐貶

鐘乳石生山洞中石液融結乳牀下垂如縣筆如假山如冰筋玲瓏透剔空如鵝管入藥良

草之屬

文草譙周蜀異物贊文草作酒能成其味案文草卽五加皮葉如蒲以五葉交加者良取入酒色醖黃元廣安稱府酒一名皮酒通典以爲文章誤

芝宋史廣安軍產芝景德四年知軍王奇獻芝草圖今無

雪藤根蔓延而長徧生山谷宋製爲紙何熙志廣安詩曰雪藤尤
易產應不數花賤今無

金剛藤蔓莖大如指細葉多刺長八九尺用入藥可祛風疾又曰
風藤咸豐初人競取爲燭以闊節者貴火燥之磁去其皮絲細而
色黃滑大者一燭二金閩廣重之

葛產原野宿根至春自生覃而誕節葉面青背白花能解酒毒其
皮析而紡之可製爲絺綌其根可食曰地瓜古人曰采葛指此
燭麻出山園益部方物記其葉如蜂螫人以溷濯之卽解莖有刺
葉有花或青或紫善治風腫析其皮紡織之製作衣帳多純白染
色亦宜唐宋舟通於吳楚

龍鬚草出龍棲橋草叢生如縷夏月莖起小穗花結細實俗曰蒲
草織爲席柔軟而緊密方輿勝覽曰廣安席似蘇

諸產農家勵土分行葉紫青夏剪其蔓種之必逐時翻蔓根實乃大有紅白二種秋收時大山尤富貧人儲備爲半歲糧芋一曰蹲鴟秦卓氏遷蜀曰聞岷山之下以蹲鴟爲糧凶年不饑乃求遷臨邛今廣畦紛植葉似荷盤走露秋采掘其根有青紫白數種子母纍然家收有餘穿窖以蓄猶王褒僮約之遺甘蔗產渠江一帶種皆白蕭家溪梭羅溪均以糖爲業利常十倍蓋金盤琥珀古糖霜之製

淡巴菰山家多植春初苗茂以油餅培壅其根則葉肥大而香厚葉最苦蟲蝕必逐日勤巡以剔蠹歲可四五收乾葉爲煙敷本境之用剉碎之曰條絲

紙竹產天池大山中多蓬戶搗竹以製紙爲業光潔精美色目不一遠近采買皆集戴市商賈歲販上通陝漢下達湘鄂不減薛濤

也方輿勝覽廣安紙似池或曰玉版卽指此

舊俗曰紅花冬布子於畦春生苗葉夏莖端如毬多刺花出毬上采之次日復出三四摘乃盡碾以染絳色鮮明爲蜀上品道咸閒順慶屬紅花利大江南遠賈來購官監其稅自洋紫競出山戶歇業然其色不耐久雨溼輒莓變今漸復種或曰茜

茶產牛角碕宋時軍有合同場遠商采買於園戶出鬻他路名曰碕茶嘉道中尙盛今出產少

木之屬

枸醬說文枸木也以爲醬漢爲珍味顏師古曰子形如山萇緣木而生味尤辛宕渠有之今呼爲枸醬樹其木多汁可用代漆

柏植園宅四時常青其大中櫬舊以千章數富有油者最堅近樵斧殆盡矣圍二十尺者價昂僅山居家有大木

膏桐產鄉村花分頰白二色清明時開徧山谷夏垂細乳秋以寒露日摘取榨房市以取油其價日昂餘桐種類亦夥不適用杉產北鄉質堅緻性冷宜冬日栽植大材中櫬枝拳曲而葉多刺隆冬不凋白雲里多有他處所罕

厚樸產白雲里木類桐葉似枇杷而差薄高十餘丈枝柯扶疎夏有花州北周通奉家園林不種而植其皮采製入藥紫油者佳枏櫚一曰櫟葉大如扇散裂幹直無枝絕似桃榔木近根處皮裹一層爲一節老結實黃如魚子說文其皮中繩今以爲蓑鞵箱衣能禦雨

柞一曰油柞枝刺叢密葉圓而尖滑其性堅韌異他木榨房取爲榨油之器

檀產山石閒性堅緻春三月始生葉皮如鐵石取爲器最耐久

紅豆木高數丈葉似槐皮青莢似扁豆其實紅古曰相思子其木文理細緻采作輿竿勁而直以製具良

苞櫟卽青桐樹大葉類櫟橡春生嫩時有白毛可飼蠶樹老者十數圍質堅實秋有子以殼承之殼可染皂山窯燒木爲炭取以圍爐火烈異於他木曰櫟炭

櫟俗曰麻柳葉似櫟狹長花橋有樹大十圍隆冬不凋每春新葉生則舊葉始落里人異之立碑其下禁剪伐焉

蟲之屬

蠶絲蟲也春桑時蠶家蓄之自卵出曰𧈧𧈧蛻曰蠶性喜燥惡溼食桑葉而不飲三眠三起二十七日而老成繭繭而蛾繭有黃白二色近日絲價倍常業此者巨富

蠶多家養野蠶不貴蓄以用其聚散驗家盛衰蠶有君臣一日兩

衙雄者尾銳雌者尾歧嗅花以鬚代鼻四時皆采花夾置兩股釀蜜成房皆濃美山家寶利之其析房每以二分曰

蟬花山林皆有益部方物記蟬之不蛻者至秋則花其頭長一二寸黃碧色治小兒瘕瘕又能已瘡

夜飛蟬一曰綠耳蟲似蟬而小硬翅能飛通體綠光金色多棲楮木上婦女取之以飾釵珥

蟾蜍產人家下溼處銳頭皤腹背多癩俗曰癩蝦蟆行極遲緩不能跳躍醫家每端陽日刺其眉漿以和藥甚珍貴然必預日購用居端陽則避矣

蝥蟴似蠶節長足短豐潔鮮白在桂曰桂蠹在橘曰橘蠹在筍曰筍蠹古人以爲珍味蓋東坡竹𪔐之類

魚之屬

嘉魚產天池山崖中或稱丙穴每歲春三月隨桃花水出穴秋九月逆流入穴亦曰嘉魚刺軟肉鮮其味甚美方輿勝覽曰廣安魚似嘉

江團一名肥鮩頭大嘴微尖在頷下眼作紅絲圈耳竅通於腦無鱗少刺鬆脆鮮好古曰鱠不易得

鯪魚俗曰參條身長白尾青黑長者三寸時浮水面性好游故名鯪魚一曰白鯪長三四寸圓若小竹筍味肥美無刺而以膏自煎一名棉花條

魴魚一名鰕小頭縮項窄脊闊腹扁身細鱗色青白腹內有肪味腴美古以其頭方故曰魴

鯽魚一名鮒色微黑亦有金色者體促腹大脊隆尾白隨時生子僅三五寸食之益人鯉之尾赤易動風火

介之屬

鰕出西溪二里上下流皆不產色紅而大徑半寸長三四寸深目長鬚人稱龍頭鰕鮮美肥實異於他產漁者每侵曉伺其出游網得之過時則無

蟹出溪澗八跪二螯九月團臍十月則尖霜後味最美凡崖石浸水處色黃而腥卽蟹之穴

鳥之屬

布穀一曰催耕鳥古之春扈每秧田綠鍼時卽至鳴聲迅急似言割麥插禾噪聒田野芒種後始止古曰禽言卽此杜宇小如鷓鴣色慘黑赤口有小冠春夜啼血達旦鳴必向北俗曰望帝夏月尤甚又曰子規蜀鳥也

翡翠大如燕喜食魚喙長腳短翡雄而赤翠雌而青惟翠色可飾

道咸閒獵戶設囹網得取其背羽販運粵廣以爲重利城中通市多珠翠店鑲嵌翦貼爭巧鬥奇近婦女首飾尙金玉業翠者較少唐李商隱詩曰巴賓翡翠翹

白鷺貴以其羽爾雅曰鷺縗隋書曰鷺鮮同光初獵戶各鄉采捕貴生賤死一羽五縑運往江南專供婦女首飾甚有鷺栖於樹購羽者將伐之鷺拔羽置樹下乃止

雉多產大山五采具飛若矢一往而墮故字從矢又名野雞文采尾長者雄文暗尾短者雌觀音閣近山等市常獵得之以爲珍味水鴨出江田似鴨而小雜青白色背有文短啄長尾卑腳紅掌肥而耐寒羣飛水中綠頭者味美與常產異尖尾次之

山雞出大山文采五色斑斕可愛喜對鏡舞常自憐其毛羽唐人詩曰巴童傍驛賣山雞今不常有